

U magazenu

Liveddu : B1, Liceu Profissionali

Parlata : Gravona, Supranacciu

Durata : 4'47"

À veda com'edda si passa a vendita è u cumprà in un magazenu di panni.

.U filmettu:

1. Un prublema di rimessa 1'04"
2. Una clienti difficiuli 1'09"
3. À compra compra... 0'50"
4. Un magazenu à serviziu ! 1'15"

SCOPI CUMUNICATIVI

- Parlà di cummerciu
- Cunnoschia a vistinghja in i particolari
- Fà pruposti è risponda ci
- Sprima una prubabilità

Sfruttera pidagogica :

.Capiscitura:

U professori si pudarà ghjuvà di l'esercizii interattivi.

1. Glubali :

. À i sculari li si dumanda di dì tuttu ciò ch'eddi poni nantu à u filmettu (paroddi, pezzi d'infrasati, situazioni...). À pocu à pocu si ghjugni à una discrizioni fundia di u cuntestu è di i situazioni.

2. À pezzi :

. Pà ogni parti si pò dumandà à i sculari di truvà un titulu.

. I sculari ripetini u più paroddi, pezzi d'infrasati o infrasati pussibili.

. U professori faci i dumandi pricisi : « quali ci hè quì ? », « comu hè u locu ? », « chì si pò dì di l'attitudina di a patrona ? » ecc...

.Sprissioni

. I sculari rifacini a passata à menti (si scegli una parti o dui di u filmettu). A poni rifà mittendu ci l'elementi parsunali.

. I sculari cercani di trascriva uni pochi d'infrasati in a so varietà.

Lessicu è cumunicazioni :

- **A ripetizioni di u gruppu verbali** : mi pari larga, mi pari ; cascu bè cascu.

- **A prubabilità** : forsi/forsa/forse, in quant'è mè, pò essa/esse, pò dà si, soca...

- **A vistitoghja** : a camisgia, a camisgetta/camisgiola, a maglietta, a lana, a sciarpa, i guanti, u manteddu, a vesta, a vistaredda, u ghjileccu, u pantalò, a coda/a rotula/a gunnella, u cappuccinu, u vistitu, u tenipettu, u calzunettu, u bagnarinu, i calzetti, i scarpi, i scarpini, i scarponi, i zocculi, i tacchi, i tacchini, i stifali, a cuffia, a barretta, u cappeddu, a cinta, i spichjetti, u fioccu, a manica, u cuddettu, a stacca, u bottulu, a ghjassa, a pidana/l'orlu/l'aricine, a cusgitura, a tacca, a taglia/a misura, u mudeddu/mudellu, a tagliata, u stili, u cuttoni, a seta, a lana, l'acrilicu, sinteticu ...

- **U prezzu, i soldi, i mezi da pagà** : caru, à bon pattu, un auru/eurò, un centimu, un bigliettu, una pezza, pagà subbitu ≠ à creditu, u sceccu, a carta di banca, u telepagamentu...

- **U magazenu** : u bancu, u bancaghju (*rayon*), a cascia, u parastaghju/parastasgiu, a tiretta/u scagnu, l'appiccapanni, a ticchetta, a scelta, l'assestu, a cabina, u spechju, u tindoni...

- **A vendita, u cummerciu** : i tarmini di rimissa/termini di rimessa (*délai de livraison*), venda, cumprà, u furnidori, un articulu di scontru, u scontu, i saldi, a dumanda è l'offerta, a cuntabilità, u privintivu, a fattura, a cumanda, venda o cumprà à l'ingrossu, u rivindarolu, a cliintedda/clientella, u/a clienti/cliente ...

- *Sprissioni* : à a moda, à l'antica, vesta si in tocchisi, tirà i prezzu, un articulu di scontru...

- *Aghjettivi* : longu, cortu, largu, strintu, scuddaghjatu/scullaghjatu, novu, vechju, frustu, pulitu, bruttu, taccatu, chjucu, maiò/grande, apartu, chjusu/chjosu, appesu/appiccatu, assistatu, stracciatu, affiuratu, à quatretti, arrigatu, pichjulatu, culuritu, ...

- *Verbi* : vesta si, spuglià si, fascià si, appuntà, spuntà, custà, cumprà, venda, spachjà, spenda, cumandà, sceglia/scedda, appiccà, assistà, pruvà, ingutuppà, allungà, accurtà, rituccà ...

Gramatica :

- **U futuru vicinu** : avè + da + verbu à l'infinitivu
- **U futuru semplici** : cantar-aghju, è/ei, à, emi, eti, ani / canter-aghju, ai, à, emu, ete, anu
- **U futuru iputeticu** : *quali sarà st'omu ? Chì t'avarani i ziteddi ?*
- **U pronomi parsunali neutru** : a so, quand'ella vi pare, hè detta.
 - *a* s'adopra davant'à una cunsunali : a so, a facciu.
 - *la* s'adopra dopu à a nigazioni, davant'à una cunsunali : ùn la dì più, ùn la mi sentu micca.
- **I suffissi sminutivi è criscitivi** : -reddu/-rellu, -leddu/-lellu, -iceddu/i-cellu, -ettu, -inu, -olu, -ucciu. -oni/-one : attenti chì pà l'ogetti u nomi suffissatu hè sempri maschili : *un casoni, un vitturone*, invece *una dunnona, una vichjona...*

Funulugia

- [ʃ]
- [tʃ]
- I vucali filati in paroddi chì si suvitani :
 - I dui vucali si prununciani sì a prima hè incalcata : *à un'ora, cantà un lamentu, magnà o bia.*
- Attenti :**
 - chì : ì pò spariscia davant'à una vucali : *u libru ch'e leghju*, ma ci voli à mantena la cù u sensu *u libru chì eiu leghju* (ch'e leghju eiu, micca tù).
 - tù : ù si pò prununcià o micca : *a sapiu ch'è tù eri/t'eri quì.*
 - *a* è *i* di i pripusizioni *da* è *di* si prununciani sempri : *hè da edda ; sò di u locu.*

.Discorsu in cuntinuvu

- Prisintà un prughjettu di criazioni di cummerciu : locu, robba, assestu, cliintedda, nomi...

.Cuntrastata

- Fareti contu d'essa in un magazenu. Vuleti cumprà una camisgia (o altru) ma nunda vi cunveni : in dui, imagnetu a discursata trà voi è u rivindarolu.

Cultura

1. I scambii cummirciali à l'Antichità

-Ramentu storicu :

.A pusizioni giugraffica di a Corsica : baratti cù l'Etruria, trà l'Africa fenicia è u Maditarraniu...

. L'Etruschi, i Grechi, i Rumani : a cera, u legnu (maghji è fasciami di batteddi) , l'oliu, a muneta, l'anfuri, i butteghi (tabernae) in Mariana, i ceramichi (attichi, campani...), metalli naturali...

Rifarenzi :

- Corsica classica, Olivier Jehasse, La Marge édition, 2003

- Aleria, nouvelles données de la nécropole, J. et L. Jehasse, MOM éditions, 2001
https://www.persee.fr/doc/mom_1274-6525_2001_mon_34_1_1317#mom_1274-6525_2001_mon_34_1_T1_0005_0000

- Corse antique, Guides archéologiques de la France, éditions du patrimoine, 2010

- Corse Net info :

. intervista https://www.corsenetinfos.corsica/Jean-Castela-La-Corse-jouait-un-role-strategique-majeur_a6285.html

. intervista https://www.corsenetinfos.corsica/Societe-des-sciences-Quand-la-Corse-produisait-exportait-et-battait-monnaie_a6218.html

2. U cummerciu in Corsica oghji ghjornu

-I sittori cummirciali

-L'appiicazioni *Compru in corsu*

Rifarenzi :

- Rivista *Economie corse*

- DVD Parolle d'eri - Omi è lochi, FR3 Corse-PNRC :

. Nu 5 : U magazenu di René Dominici in Macinaghju (10 mn)

. Nu 9 : U macidaru, Joseph Bartoli, in Santa Lucia di Tallà (8 mn).

- <https://www.insee.fr/fr/statistiques/1379338>

-Lessicu :

- www.ac-corse.fr/lcc_20/file/2290/
- <http://educorsica.fr/lessicu/>
- <http://infcorsica.adecec.net>
- <http://parlemucorsu.blogspot.com/2013/11/sapatu-u-23-di-nuvembri-2013-ghjurnata.html>